

DOMINGU III TEMPU KOMÚN – TINAN A

Tema

Liturjia domingu ne'e nian apresenta mai ita projetu salvasaun no moris nakonu ne'ebé Maromak iha atu oferese ba mundu no ba ema sira: projetu “Reinu” nian.

Iha *primeira leitura*, profeta/poeta Isaías haklaken naroman ne'ebé Maromak sei halo nabilan husi foho sira Galileia nian atu halo nakukun ne'ebé falun ema hotu prizioneiru mate nian, injustisa nian, terus nian, dezesperu nian.

Evanjellu deskreve promesa profétika nia realizasaun: Jezús mak roman ne'ebé hahú nabilan iha Galileia no propoin ba ema sira rai hotu nia Lia-Foun Di'ak kona-ba “Reinu” ne'ebé mai. Ba Jezús nia apelu, dixípulu sira hatán: sira mak destinatáriu dahuluk proposta nian no sasin ne'ebé simu knaar atu lori “Reinu” ba rai tomak.

Segunda leitura apresenta comunidade eskolante sira ninia moris, ne'ebé haluha tiha Jezús no Ninia proposta. Paulo, apóstolu, husu maka'as sarani sira atu deskobre filafali fundamentu sira-nia fiar nian no kompromisu sira asume iha loron batizmu nian.

LEITURA I – Is 8,23b-9,3

Livru profeta Isaías nian propoin konjuntu ida orákulu sira hanaran “mesiániku”, ne'ebé habiit Povu nia esperansa ba mundu ida justisa no dame nian ne'ebé Maromak, iha futuro, iha data ida ne'ebé la marka, sei oferese ba ninia emar sira.

Ita-nia testu pertense ba faze ikus profeta nia moris nian. Ita iha finál sékulu VIII mK. Asíriu sira (ne'ebé iha 721 mK konkista Samaria, kapitál tuan reinu Israel nian) hanehan no hamoe tribu sira Maromak nia Povu nian ne'ebé hela iha rejiaun norte país nian (Zabulão no Neftali); nakukun laran-susar no mate nian falun rejiaun tomak Palestina nian ne'e tomak.

Iha súl, iha Jerusalém, Ezequias mak ukun. Liurai, ne'ebé iha interese ba profeta nia indikasaun sira (ne'ebé dehan katak aliansa ho povu estranjeiru mak sintoma infidelidade boot ba Jahwéh, tanba signífika tau konfiansa no esperansa ba ema sira), haruka embaixada ba Egipto, Fenícia no Babilónia, hodi buka konsolida frente hasoru kbiit boot tempu ne'ebá nian – Assíria. Senaquerib, liurai Assíria nia resposta la hein: manán tiha membru sira koligasaun nian, nia fila fali kontra Judá, harahun país no tau serku ba Jerusalém (701 mK). Ezequias tenke submete ba Assíria no selu tributu todan ba assíriu sira.

Profeta ne'ebé lakon fiar ba liurai sira no polítika, hahú mehi ho Maromak nia intervensaun ne'ebé sei oferese ba Povu mundu foun ida, liberdade no dame nian. Karik testu ohin nian tempu ne'e nian.

MENSAJEN

Ita-nia testu harii iha jogu ida opozisaun sira-nian: “hatuun/hamahan ho glória”, “nakukun/naroman”, “la'ó iha nakukun mate nian (dezolasaun, dezesperu)/kolok no kontentamentu”. Konseitu negativu sira (“hatuun”, “nakukun”, “la'ó iha nakukun mate nian”) define situasaun atuál; konseitu pozitivu sira (“hamahan ho glória”, “naroman”, “ksolok no kontentamentu”) define situasaun abanbairua nian.

Oinsá hakat husi situasaun opresaun, frustrasaun, dezesperu nian, ba situasaun ksolok, kontentamentu, esperansa abanbairua nian?

Profeta ko'alia kona-ba "naroman ida" ne'ebé sei leno iha foho Galileia nia leten no sei haroman rai tomak. Naroman ne'e sei halakon "nakukun" ne'ebé hanehan Povu no halakon esperansa no inaugura loron foun ksolok no dame rohan-laek. Atu haktuir ksolok ne'e, profeta utiliza ilas rua: hanesan loron bainhira ko'a hare hotu ona, ema hotu bidu haksolok, selebra ai-han naresin; hanesan mós bainhira remata soro/kasa, soro-na'in sira fahe ba malu buat ne'ebé sira kaer ba malu.

Maromak mak orijen naroman libertadora no rekriadora (versíkulu 3): Nia mak harahun oe opresór nian ne'ebé hamosu moris-atan no umillasaun. Mundu foun ksolok no dame rohan-laek mak don ida Maromak nian.

LEITURA II – 1 Cor 1,10-13.17

Husik tiha sidade Corinto, Paulo kontinua iha kontaktu ho comunidade sarani. Maski dook, nia kontinua akompaña comunidade nia moris, sira-nia problema no difikuldade.

Bainhira nia hakerek surat dahuluk ba Corinto, Paulo iha hela Éfeso. Notísia ladún di'ak husi Corinto to'o iha Paulo nia tilun. Bainhira Paulo sai tiha husi ne'ebá, pregadór sarani ida – naran Apolo. Apolo, judeu husi Antioquia, ne'ebé konverte an ba kristianizmu to'o iha ne'ebá. Nia matenek no hatene didi'ak Eskritura no tulun maka'as comunidade iha polémika ho judeu sira. Nia hatene uza didi'ak liafuan sira liufali Paulo. Husi ne'e mosu partidu iha comunidade (maski Apolo la favorese divizaun): balun admira Paulo, balun Cefas (Pedro), balun fali Apolo (kf. 1 Cor 1,12). Sira forma "partidu", tuir eskola filozófika sira sidade nian, ne'ebé iha ninia mestre sira, no hale'u mestre sira iha ninia eskolante sira eh simpatizante: kristianizmu sai tiha hanesan eskola sabedouria nian, iha ne'ebé ema hili mestre matenek liu.

Situasaun ne'e preokupa maka'as Paulo: aleinde konfliktu no rivalidade ne'ebé divizaun provoka, buat ne'ebé iha perigu nia laran mak fiar nia esénsia. Kristianizmu hetan perigu atu sai eskola sabedouria nian, no ninia validade depende ba mestre sira nia kapasidade atu apresenta ideolojia no kbiit atu konvense.

MENSAJEN

Ba Paulo, kristianizmu la'ós hili filozofia ida moris nian ne'ebé ninia mestre defende ho matenek; maibé adezaun ba Jezús Kristu, mestre ida mesak no loos.

Paulo la sukat nia liafuan sira: ba Kristu no ba Kristu mesak mak sarani sira hetan konsagrasaun iha batizmu. Kristu mesak mak bee-matan/fonte salvasaun nian. Sai sarani katak tama atu halo parte Kristu nia isin no partisipa iha akontesimentu salvasaun iha-ne'ebé Kristu mesak mak mediadór. Dehan katak ema ida Paulo nian, eh Cefas nian, eh Pedro nian, katak desvia an husi esénsia fiar sarani nian. Paulo mak ema hedi iha krús ba ema Corinto sira nia salvasaun? Batizmu ne'e signifika adezaun ba Paulo nia doutrina, eh ba mestre seluk ruma?

Importante liu la'ós ida ne'ebé sarani eh haklaken Evanjellu: Kristu mak importante, no Paulo, Cefas no Apolo mak instrumentu umanu simples de'it. Paulo husu sarani sira Corinto nian atu keta tau atensaun iha mestre umanu sira no deskobre filafali Kristu, mate iha krús atu fó moris ba ema hotu, nu'udar esénsia sira nia fiar no kompromisu. Halo nune'e, comunidade sei sai família ida maun-alin sira nian, ne'ebé simu moris husi Kristu, ne'ebé moris iha unidade no komuñaun.

EVANJELLU – Mt 4,12-23

Testu ne'ebé propoin mai ita mak testu ida xarneira nian, ne'ebé taka etapa preparasaun Jezús nian ba misaun (kf. Mt 3,1-4,16) no lansa etapa anúnsiu Reinu nian.

Ita iha Galileia, zona populasaun kahur-malu no pontu enkontru nian entre povu barak. Nia mós refere sidade Cafarnaum: kapitál Galileia judeu sira nian (Tiberíades, kapitál polítika rejiaun nian, tanba sira nia lisan mak jentiu nian no tanba harii iha rate ida nia leten, judeu sira evita tama iha sidade ne'e). Sidade Cafarnaum ninia situasaun jeográfika loke odamatan ba povu jentiu sira iha tasi Tiberíades nia lorosa'e.

MENSAJEN

Iha primeira parte (kf. Mt 4,12-16), Mateus refere oinsá Jezús husik Nazaré, nia rezidénsia baibain no muda ba Cafarnaum. Mateus, iha Is 8,23-9,1 nia roman deskobre iha faktu ida-ne'e signifikadu kle'an ida: ba Mateus, "naroman" ne'ebé tenke halakon nakukun mate nian ne'ebé Isaías haktuir, mak Jezús rasik. Iha rai ne'ebé terus Zabulão no Neftali nian, sei mosu roman ida libertasaun nian; libertasaun ne'e sei to'o ba jentiu sira mós, sira ne'ebé simu anúnsiu Reinu nian Hodi tau anúnsiu dahuluk iha Cafarnaum, Mateus apresenta dimensaun universál Jezús nia misaun nian.

Iha segunda parte (kf. Mt 4,17-23), Mateus apresenta lansamentu misaun Jezús nian.

Konteúdu báziku anúnsiu nian ita haree iha 17: Jezús mai atu lori "Reinu". Espresaun "Reinu Maromak nian" (eh "Reinu lalehan") refere ba Maromak nia kbiit soberanu iha ema sira no iha mundu. Tanba la kontente liurai sira, Maromak nia Povu hahú mehi tempu foun, iha ne'ebé Maromak rasik mak ukun nia Povu; reinu ne'e marka iha perspetiva teólogo sira Israel nian – ho justisa, ho laran-sadia, ho preokupasaun Maromak nian iha relasaun ho ema kiak sira no marjinalizadu sira, ho abundánsia no fekundidade, ho dame rohan-laek.

Jezús iha konxiénsia katak "reinu" ne'ebé to'o daudaun liga ho Ninia An rasik. Ninia anúnsiu dahuluk ba Mateus, habadak ho slogan tuirmai: "Imi hakribi an ('metanoeite') tanba Reinu lalehan to'o daudaun mai".

Konvite ba konversaun ("metanoia") mak konvite ida mudansa radikál mentalidade nian, iha valór sira, iha postura vitál. Konversaun katak orienta moris ba Maromak, sukat moris atu Maromak no ninia valór sira tama iha sentru ezisténsia ema nian; bainhira ema aseita atu Maromak okupa Ninia fatin iha moris, nia prontu atu aseita Maromak nia ukun no halo sai realidade iha mundu no iha fuan sira.

Tuirmai, Mateus apresenta Jezús harii "Reinu" ho modu ativu (vers. 23-24): ninia liafuan sira haklaken realidade foun ne'e no niia jestu sira (milagre sira, kura sira, vitória husi sira ne'ebé na'ok ema nia moris no ema nia ksolok) mak sinál evidente katak Maromak hahú ukun no nakfilak moris-atan iha vida no liberdade.

Ikusnian, Mateus haktuir dixípulu dahuluk sira nia bolun (vers. 18-22). La'ós relatu jornalístilu akontesimentu nian, maibé katekeze ida kona-ba bolun/xamamentu no adezaun ba projetu "Reinu" nian. Liuhusi resposta pronta Pedro no André nian, Tiago no João nian, propoin mai ita ezemplu konversaun radikál ba "Reinu" no adezaun ba ninia ezijénsia sira.

Iha diferença fundamental entre sira ne'ebé tuir Jezús no sira ne'ebé tuir mestre sira judaizmu nian: la'ós dixípulu sira mak hili mestre no husu atu tama iha nia grupu; maibé iniciativa Jezús nian, ne'ebé bolu dixípulu sira ne'ebé Nia rasik hili, konvida atu tuir Nia no propoin misaun ida.

Eskolante na'in haat nia resposta ba bolun sai paradigma ida: haluha família, serbisu, seguransa sira no tuir Jezús laho kondisaun, nu'udar opsaun radikál ba "Reinu" no ninia ezijénsia sira.

Misaun ne'ebé Jezús propoin mak sai peskadór ema sira-nian. Tasi, iha kultura judaika, mak fatin demóniu nian, kbiit sira mate nian ne'ebé opoin ba ema nia moris no ema nia ksolok; dixípulu nia knaar mak liberta ema sira husi mate no moris-atan.

Eskolante na'in haat ne'e reprezenta grupu hotu eskolante nian, husi tempu no fatin hotu... Sira tenke hatán ho modu pozitivu ba bolun, hili "Reinu" no ninia ezijénsia sira no sai sasin moris no salvaun Maromak nian iha ema sira no mundu nia leet.